

→ ISU

# UMPH jana RM3.08j untuk UMP

● Syarikat milik penuh bantu universiti pelbagai pendapatan

Oleh Nurul Nadira Shaari  
cnews@NSTP.com.my

► Kuantan

**U**MP Holdings (UMPH), syarikat milik penuh Universiti Malaysia Pahang (UMP) komited untuk mempelbagaikan dan mengembangkan cabang perniagaan syarikat itu ke tahap lebih tinggi, sekali gus dapat memberi lebih banyak sumbangan kepada komuniti universiti itu.

Ketua Pegawai Eksekutif UMPH, Syed Mohamad Hamzah Al Junid Syed Abd Rahman, berkata menjadi tanggungjawab UMPH untuk mempelbagaikan perniagaannya yang kini tertumpu kepada pembangunan dan pengurusan har-

tanah, perundingan dan latihan serta perkhidmatan teknologi maklumat dan komunikasi (ICT).

Beliau berkata, ia juga dilihat satu usaha syarikat bagi membantu UMP bagi menyentuh saranan untuk mengurangkan kebergantungan kepada kerajaan dalam menjana pendapatan.

### Komersial produk baharu

"Selaku anak syarikat milik penuh UMP, UMPH akan terus menjadi pemangkin bukan sahaja terus kompetitif dalam bidang perniagaan yang diceburi, tetapi pada masa sama terus membantu mengkomersialkan pelbagai produk baharu yang berdaya saing hasil kejuaran penyeleksi UMP.

"Kami sentiasa berusaha mencari kaedah untuk mempelbagaikan dan meluaskan perniagaan syarikat supaya lebih banyak sumbangan boleh diberi kepada seluruh komuniti universiti ini," katanya dalam kenyataan media di sini, semalam.

Syed Mohamad Hamzah berkata, UMPH turut menyerahkan sumbangan RM3.08 juta kepada

pengurusan UMP bagi membantu mengurangkan kebergantungan institusi itu kepada kerajaan.

Beliau berkata, jumlah berkenaan merangkumi dividen pelaburan tahun lalu, honorarium perunding, sumbangan, yuran perundingan dan perkhidmatan profesional.

"UMPH merekodkan pencapaian pertumbuhan 65 peratus dalam masa tiga tahun dalam pelbagai aktiviti perniagaan, termasuk sektor harta tanah, pembinaan, pengurusan fasiliti, perundingan dan khidmat teknikal serta bidang pengkomersialan," katanya.

Penyerahan sumbangan kepada Naib Canselor UMP, Datuk Seri Prof Dr Daing Mohd Nasir Ibrahim itu dilakukan di Bangunan Canseleri Tun Abdul Razak, UMP Kampus Pekan.

"Pemberian sumbangan ini juga inisiatif syarikat dalam melaksanakan program tanggungjawab sosial korporat (CSR) bagi membantu UMP mencapai matlamat menjadi institusi yang melahirkan pelajar modal insan berkualiti dalam pelbagai bidang," katanya.



**Daing Mohd Nasir (kiri) menerima replika cek RM3.08 juta daripada Syed Mohamad Hamzah Al Junid di Bangunan Canseleri Tun Razak, UMP Kampus Pekan, semalam.**